

此人於今者 心如大河海
貪求無厭足 云何名少欲
今修此苦行 貪渴五欲故
此人實虛偽 詐現少欲相
為貪故自苦 實非少欲者

說是偈已。優婆塞復作是言。今者此人具諸貪欲瞋恚愚癡。仙聖所行無有少分。是故當知。夫少欲者不在錢財多諸寶物。何以知之。如頻婆娑羅王富有國土象馬七珍。猶名少欲。所以者何。雖有財寶心不貪著樂於聖道。以是之故雖復富有七珍盈溢。心無希求名為少欲。雖無財寶希求無厭。不得名為少欲知足。即說偈言

若以無衣食 保形尼乾等
造作諸勤苦 以為苦行者
餓鬼及畜生 貧窮諸衰惱
斯等處艱難 亦應名苦行

（六）復次雖復持戒。為人天樂是名破戒。我昔曾聞。有一沙門與婆羅門於空林中夏坐安

居。于時沙門數數往返婆羅門所。與其共事不存親疎正處其中。所以者何。若與親昵恐其生嬌慢。若與其疎謂為憎惡。即說偈言

以杖置日中 竪臥俱無影

執杖倚亞者 其影則脩長

彼人亦如是 親疎宜得中

令漸通泰已 然後為說法

此婆羅門無有智慧。不別賢愚供事極苦。是以

我今不宜親昵亦不應疎。何以故。事愚人苦不解供事亦名為苦。種種方便共相習近。漸相體

信得與言語。爾時比丘問婆羅門。汝今何故舉

手向日。臥灰土上裸形噉草。晝夜不臥翹足而

立。行此苦行為何所求。婆羅門答曰。我求國

王。此婆羅門於後少時身遇病患。往問醫師療

疾之方。醫師報言。宜須食肉。於是婆羅門語

比丘言。汝可為我至檀越家乞索少肉以療我

疾。于時比丘作是思惟。我今化彼正是其時。作是念已化為一羊繫著其邊。婆羅門問比丘言。汝為索肉今在何處。比丘答言。羊即是肉。

婆羅門大生瞋恚而作是言。我寧殺羊而食肉

耶。於是比丘說偈答言

汝今憐一羊 猶尚不欲殺

後若為國王

牛羊與豕豕

鷄犬及野獸

殺害無有量

汝在御座上

厨宰供汝食

汝若瞋恚時

當言斬彼頭

或言截手足

又時教挑目

汝今憐一羊

方欲多殺害

若實有悲心

宜捨求王意

如人臨刑戮

畏苦多飲酒

華林極敷榮

猛火將欲焚

又如著金鎖

雖好能繫縛

王位亦如是 恒有恐懼心
威力諸侍從 莊嚴以珍寶
不見後過患 凡夫貪願求
既得造諸惡 墜墮三惡道
如蛾貪火色 投中自燒滅
雖有五欲樂 名稱普聞知
恒多懷恐懼 憂苦患極深
猶如捉毒蛇 逆風持炬火
不捨危害至 亦如臨死苦
王者遊出時 頂上戴天冠
眾寶自瓔珞 上妙莊嚴服
名馬眾寶車 乘之出遊巡
道從數百千 威勢極熾盛
若有寇敵時 寶鎧自嚴身
勝則多殺害 負則失身命
妙香以塗身 上服以香熏

所食諸餚饌 百味恣其口
所須皆隨意 無有違逆者
行來若坐臥 舉動悉疑畏
親友亦不信 虽復為親友
恒有危懼心 云何名為樂
如魚吞鉤餌 如蜜塗利刀
亦如網羅縛 魚獸貪其味
不見後苦患 貴富亦如是
終受地獄苦 地獄垣牆壁
屋地皆熾然 罪人在其中
火出自燒身 受苦無有量
汝當自思惟 是故應念苦
眾苦患甚多 所為樂既少
莫求貴自在 捨汝願求心
唯有求解脫 羣苦悉消除

婆羅門聞是偈已默然不答。合掌向比丘白言。

尊者。善有辯才開悟我心。設使得彼三十二天王者亦不甘樂。即說偈言

善意巧方便 明智能觀察
為我除邪願 示導正真路
善友當如是 世間所稱讚
常應近是友 無有諍惱患

善導我心意 迥邪入正道
示我善惡相 令得於解脫

(七) 復次依邪道者得眾苦患。修正道者增長信心及以名稱。有智之人應觀邪正。我昔曾聞。有一人於行路側作小苦行。若有人時臥棘刺上。若無人時別居餘處。有人見已而語之言。汝今亦可徐臥刺上。何必縱體傷毀甚多。此人聞已深生瞋忿。放身縱體投棘刺上轉劇於前。時有一優婆塞在其傍立。是苦行者見已自擺轉復增劇。優婆塞即語之言。汝於前者但以

小刺。今復乃用瞋恚之棘而以自刺。先所刺者傷毀甚淺。貪瞋之刺乃為深利。臥棘刺者苦止一世。貪瞋刺苦及無量身。以刺刺身此瘡易滅。貪瞋刺瘡歷劫不差。是故宜速除深毒刺。

即說偈言

汝今應勤拔 心中深毒刺
宜以利智刀 割斷貪瞋棘
貪瞋深著人 不識正真道
愚小諸邪見 世世不可祛
苦身臥棘刺 以苦欲離苦
人見臥棘刺 無不遠逃避
唯汝於斯苦 抱持不放捨
我見如此事 乃知有邪正
是故重自歸 十力之世尊
大悲拔眾苦 開示正道者
涉彼邪徑眾 導以八正道